

四庫全書

集部

欽定四庫全書

集部

東坡全集卷七十二

詳校官庶吉士臣謝恭銘

檢討臣何思鈞覆勘

總校官進士臣朱鈴

校對官待詔臣胡士震

謄錄監生臣楊鰲

欽定四庫全書

東坡全集卷七十二

宋 蘇軾 撰

書十一首

上梅直講書

某官執事某每讀詩至鴟鴞讀書至君奭常竊悲周公
之不過及觀史見孔子厄於陳蔡之間而絃歌之聲不
絕顏淵仲由之徒相與問答夫子曰匪兕匪虎率彼曠
野吾道非邪吾何為於此顏淵曰夫子之道至大故天

下莫能容雖然不容何病不容然後見君子夫子油然而笑曰回使爾多財吾為爾宰夫天下雖不能容而其徒自足以相樂如此乃今知周公之富貴有不如夫子之貧賤夫以召公之賢以管蔡之親而不知其心則周公誰與樂其富貴而夫子之所與共貧賤者皆天下之賢才則亦足與樂乎此矣軾七八歲時始知讀書聞今天下有歐陽公者其為人如古孟軻韓愈之徒而又有梅公者從之遊而與之上下其議論其後益壯始能讀

其文詞想見其為人意其飄然脫去世俗之樂而自樂其樂也方學為對偶聲律之文求斗升之祿自度無以進見於諸公之間來京師逾年未嘗窺其門今年春天下之士羣至於禮部執事與歐陽公實親試之誠不自意獲在第二既而聞之人執事愛其文以為有孟軻之風而歐陽公亦以其能不為世俗之文也而取焉是以此非左右為之先容非親舊為之請屬而嚮之十餘年間聞其名而不得見者一朝為知己退而思之人不

可以苟富貴亦不可以徒貧賤有大賢焉而為其徒則亦足恃矣苟其僥一時之幸從車騎數十人使閭巷小民聚觀而贊歎之亦何以易此樂也傳曰不怨天不尤人蓋優哉游哉可以卒歲執事名滿天下而位不過五品其容色溫然而不怒其文章寬厚敦朴而無怨言此必有所樂乎斯道也軾願與聞焉

上韓太尉書

軾生二十有二年矣自七八歲知讀書及壯大不能曉

習時事獨好觀前世盛衰之迹與其一時風俗之變自三代以來頗能論著以為西漢之衰其大臣守尋常不務大畧東漢之末士大夫多奇節而不循正道元成之間天下無事公卿將相安其祿位顧其子孫各欲樹私恩買田宅為不可動之計低回畏避以苟歲月而皆依倣儒術六經之言而取其近似者以為口實孔子曰惡居下流而訕上惡訐以為直劉歆谷永之徒又相與彌縫其闕而緣飾之故其衰也靡然如蛟龍釋其風雲之

勢而安於豢畜之樂終以不悟使其肩披股裂登於匹夫之俎豈不悲哉其後桓靈之君懲往昔之弊而欲樹人主之威權故頗用嚴刑以督責臣下忠臣義士不容於朝廷故羣起於草野相與力為險怪驚世之行使天下豪俊奔走於其門得為之執鞭而其自喜不啻若卿相之榮於是天下之士囂然皆有無用之虛名而不適於實效故其亡也如人之病狂不知堂宇宮室之為安而號呼奔走以自顛仆昔者太公治齊舉賢而尚功周

公曰後世必有篡弑之臣周公治魯親而尊尊太公
曰後世浸微矣漢之事迹誠大類此豈其當時公卿士
大夫之行與其風俗之剛柔各有以致之邪古之君子
剛毅正直而守之以寬忠恕仁厚而發之以義故其在
朝廷則士大夫皆自洗濯磨淬戮力於王事而不敢為
非常可怪之行此三代王政之所由興也曾子曰上失
其道民散久矣天下之人幸而有不為阿附苟容之事
者則務為倜儻矯異求如東漢之君子惟恐不及可悲

也已軾自幼時聞富公與太尉皆號為寬厚長者然終不可犯以非義及來京師而二公同時在兩府愚不能知其心竊於道塗望其容貌寬然如有容見惡不怒見善不喜豈古所謂大臣者歟夫循循者固不能有所為而翹翹者又非聖人之中道是以願見太尉得聞一言足矣太尉與大人最厚而又嘗辱問其姓名此尤不可以不見今已後矣不宣軾再拜

上富丞相書

軾聞之進說於人者必其人之有間而可入則其說易
行戰國之人貪天下之士因其貪而說之危國之人懼
天下之士因其懼而說之是故其說易行古之人一說
而合至有立談之間而取公相者未嘗不始於戰國危
國何則有間而可入也居今之世而欲進說於明公之
前不得其間而求入焉則亦可謂天下之至愚無知者
矣地方萬里而制於一姓極天下之尊而盡天下之富
不可以有加矣而明公為之宰四夷不作兵革不試是

明公無貪於得而無懼於失也方西戎之熾也敵人乘間以跨吾北中國之大不畏而畏明公之一詞是明公之勇冠於天下也明公居於山東而傾河朔之流人父棄其子夫棄其妻而自歸於明公者百餘萬明公人而食之旦旦而撫之此百萬人者出於溝壑之中而免於烏鵲豺狼之患生得以養其父母而祭其祖考死得以使其子孫塋埋祭祀不失其故常是明公之仁及於百世也勇冠於天下而仁及於百世士之生於世如此

亦足矣今也處於至足之勢則是明公無復有所羨慕
於天下之功名也五帝三代之事百家之書莫不盡讀
禮樂刑政之大小兵農財賦之盛衰四海之內地理之
遠近山川之險易物土之所宜莫不盡知當世之賢人
君子與夫姦偽嶮詐之徒莫不盡究至於曲學小數茫
昧慳怵而不可知者皆獵其華而咀其英泛其流而涉
其源雖自謂當世之辯不能傲之以其所不知則是明
公無復有所畏憚於天下之博學也名為天下之賢人

而貴為天子之宰無貪於得而無懼於失無羨於功名而無畏於博學是其果無間而可入也天下之士果不可以進說也軾也聞之楚左史倚相曰昔衛武公年九十有五猶日箴儆於國曰自卿以下至於官師苟在朝者無謂我老耄而舍我朝夕以交戒我猶以為未也而作詩以自戒其詩曰抑抑威儀惟德之隅夫衛武公惟居於至足而日以為不足故其沒也謚之曰睿聖武公嗟夫明公豈以其至足而無間以拒天下之士則士之

進說者亦何必其間之入哉不然軾將誦其所聞而明
公試觀之夫天下之小人所為奔走輻輳於大人之門
而為之用者何也大人得其全小人得其偏大人得其
全故能兼受而獨制小人得其偏是以聚而求合於大
人之門古之聖人惟其聚天下之偏而各收其用以為
非偏則莫肯聚也是故不以其全而責其偏夫惟全者
之不可以多有也故天下之偏者惟全之求今以其全
而責其偏夫彼若能全將亦為我而已矣又何求焉昔

者夫子廉潔而不為異衆之行勇敢而不為過物之操
孝而不徇其親忠而不犯其君凡此者是夫子之全也
原憲廉而至於貧公良孺勇而至於鬪曾子孝而徇其
親子路忠而犯其君凡此者是數子之偏也夫子居其
全而收天下之偏是以若此巍巍也若夫明公其亦可
謂天下之全矣廉而天下不以為介直而天下不以為
訐剛健而不為強敦厚而不為弱此明公之所得之於
天而天下之所不可望於明公者也明公居其全天下

效其偏其誰曰不可異時士大夫皆喜為卓越之行而
世亦貴狡悍之才自明公執政而朝廷之間習為中道
而務循於規矩士之矯飾力行為異者衆必共笑之夫
卓越之行非至行也而有取於世狡悍之才非真才也
而有用於天下此古之全人所以坐而收其功也今天
下卓越之行狡悍之才舉不敢至於明公之門懼以其
不純而獲罪於門下軾之不肖竊以為天下之未大治
兵之未振財之未豐天下之有望於明公而未獲者其

或由此也歟昔范公收天下之士不考其素苟可用者莫不咸在雖其狂獗無行之徒亦自效於下風而范公亦躬為詭特之操以震之夫范公之取人者是也其自為者非也伏惟明公以天下之全而自居去其短而襲其長以收功於無窮軾也西南之匹夫求斗升之祿而至於京師翰林歐陽公不知其不肖使與於制舉之末而發其猖狂之論是以輒進說於左右以為明公必能容之所進策論五十篇貧不能盡寫而致其半觀其大

略幸甚

上曾丞相書

軾聞之將有求於人而其說不誠則難以望其有合矣
世之奇特之士其處也莫不為異衆之行而其出也莫
不為怪詭之詞比物引類以搖撼當世理不可化則欲
以勢劫之將以術售其身古之君子有韓子者其為說
曰王公大人不可以無貧賤之士居其下風而推其後
大其聲名而久其傳雖其貴賤之闊絕而其相須之急

不啻若左右手嗚呼果其用是說也則夫世之君子所
為老死而不遇者無足怪矣今夫扣之者急則應之者
疑其辭夸則其實必有所不副今吾以為王公大人不
可以一日而無吾也彼將退而考其實則亦無乃未至
於此耶昔者漢高未嘗喜儒而不失為明君衛霍未嘗
薦士而不失為賢公卿吾將以吾之說而彼將以彼之
說彼是相拒而不得其歡心故貴賤之間終不可以合
而道終不可以行何者其扣之急而其詞夸也鬻千金

之壁者不之於肆而願觀者塞其門觀者歎息而主人
無言焉非不能言知言之無加也令也不幸而坐於五
達之衢又呶呶焉自以為希世之珍過者不顧執其裾
而強觀之則其所鬻者可知矣王公大人其無意於天
下後世者亦安以求為也苟其不然則士之過於其前
而有動於其目者彼將褰裳疾行而撻取之故凡皇皇
汲汲者舉非吾事也昔者嘗聞明公之風矣以大臣之
子孫而取天下之高第才足以過人而自視缺然常若

不足安於小官而樂於恬淡方其在太學之中衣繒飯糗若將終身至於德發而不可掩名高而不可抑貴為天子之少宰而其自視不加於其舊之錙銖其度量宏達至於如此此其尤不可以夸詞而急扣者也軾不佞自為學至今十有五年以為凡學之難者難於無私無私之難者難於通萬物之理故不通乎萬物之理雖欲無私不可得也已好則好之已惡則惡之以是自信則惑也是故幽居默處而觀萬物之變盡其自然之理而

斷之於中其所不然者雖古之所謂賢人之說亦有所
不取雖以此自信而亦以此自知其不悅於世也故其
言語文章未嘗輒至於公相之門今也天子舉直諫之
士而兩制過聽謬以其名聞竊以為與於此者皆有求
於吾君吾相者也故輒有獻其文凡十篇而書為之先
惟所裁擇幸甚

應制舉上兩制書

軾聞古者有貴賤之際有聖賢之分二者相勝而不可

以相參其勢然也治其貴賤之際則不知聖賢之為高
行其聖賢之分則不知貴賤之為差昔者子思孟軻之
徒不見諸侯而耕於野比閭小吏一呼於其門則攝衣
而從之至於齊魯千乘之君操幣執贄因門人以願交
於下風則閉門而不納此非苟以為異而已將以明乎
聖賢之分而不參於貴賤之際故其攝衣而從之也君
子不以為畏而其閉門而拒之也君子不以為傲何則
其分定也士之賢不肖固有之矣子思孟軻不可以人

人而求之然而貴賤之際聖賢之分二者要以不可不知也世衰道喪不能深明於斯二者而錯行之施之不得其處故其道兩亡今夫軾朝生於草茅塵土之中而夕與於州縣之小吏其官爵勢力不足較於世亦明矣而諸公之貴至與人主揖讓周旋而無間大車駟馬至於門者逡巡而不敢入軾也非有公事而輒至於庭求以賓客之禮見於下執事固已獲罪於貴賤之際矣雖然當世之君子不以其愚陋而使與於制舉之末朝廷

之上不以其疎賤而使奏其猖狂之論軾亦自忘其不肖而以為是兩漢之主所孜孜而求之親降色辭而問之政者也其才雖不足以庶幾於聖賢之間而學其道治其言則所守者其分也是故踴躍然而來仰不知明公之尊而俯不知其身之賤不由紹介不待辭讓而直言當世之故無所委曲者以為貴賤之際非所以施於此也軾聞治事不若治人治人不若治法治法不若治時時者國之所以存亡天下之所最重也周之衰也時

人莫不苟媿而不立周雖欲其立而不可得也故周亡
秦之衰也時人莫不貪利而不仁秦雖欲其仁而不可
得也故秦亡西漢之衰也時人莫不柔懦而謹畏故君
臣相蒙而至於危東漢之衰也時人莫不矯激而奮厲
故賢不肖不相容以至於亂夫時者豈其所自為邪王
公大人實為之軾將論其時之病而以為其權在諸公
諸公之所好天下莫不好諸公之所惡天下莫不惡故
軾敢以今之所患二者告於下執事其一曰用法太密

而不求情其二曰好名太高而不適實此二者時之大患也何謂用法太密而不求情昔者天下未平而法不立則人行其私意仁者遂其仁勇者致其勇君子小人莫不以其意從事而不困於繩墨之間故易以有功而亦易以亂及其治也天下莫不趨於法不敢用其私意而惟法之知故雖賢者所為要以如法而止不敢於法律之外有所措意夫人勝法則法為虛器法勝人則人為備位人與法並行而不相勝則天下安令自一命以

上至於宰相皆以奉法循令為稱其職拱手而任法曰
吾豈得自由哉法既大行故人為備位其成也其敗也
其治也其亂也天下皆曰非我也法也法之弊豈不亦
甚矣哉昔者漢高之時留侯為太子少傅位於叔孫之
後而周昌亦自御史大夫為諸侯相天下有緩急則功
臣左遷而不怨此亦知其君臣之權不以法而相持也
今天下所以任法者何也任法生於自疑自疑生於多
私惟天下之無私則能於法律之外有以效其智何則

其自信明也夫唐永泰之間姦臣執政政以賄成德宗發憤而用常袞袞一切用法四方奏請莫有獲者然天下否塞賢愚不分君子不以為能也崔祐甫為相不至暮年而除吏八百多其親舊或者以為譏祐甫曰不然非親與舊則安得而知之顧其所用如何爾君子以為善用法今天下泛泛焉莫有深思遠慮者皆任法之過也何謂好名太高而不適實昔者聖人之為天下使人各致其能以相濟也不一則不專不專則不能自堯舜

之時而伯夷后夔稷契之倫皆不過名一藝辦一職以盡其能至於子孫世守其業而不遷夔不敢自與於知禮而契不敢自任於播種至於三代之際亦各輸其才而安其習以不相犯躐凡書傳所載者自非聖人皆止於名一藝辦一職故其藝未嘗不精而其職未嘗不舉後世之所希望而不可及者由此故也下而至於漢其君子各務其所長以相左右故史之所記武宣之際自公孫魏邴以下皆不過以一能稱於當世夫人各有才

才各有小大大者安其大而無忽於小小者樂其小而無慕於大是以各適其用而不喪其所長及至後世上失其道而天下之士皆有侈心耻以一藝自名而欲盡天下之能事是故喪其所長而至於無用今之士大夫其實病此也仕者莫不談王道述禮樂皆欲復三代追堯舜終於不可行而世務因以不舉學者莫不論天人推性命終於不可究而世教因以不明自許太高而措意太廣太高則無用太廣則無功是故賢人君子布於

天下而事不立聽其言則侈大而可樂責其效則汗漫而無當此皆好名之過深惟古之聖賢建功立業興利捍患至於百工小民之事皆有可觀不若今世之因循鹵莽其故出於此二者歟伏惟明公才略之宏偉度量之寬厚學術之廣博聲名之煒燁冠於一時而振於百世百世之所望而正者意有所向則天下奔走而趨之則其隘時憂世之心或有取於斯言也軾將有深於此者而未敢言焉不宣軾再拜

上劉侍讀書

軾聞天下之所少者非才也才滿於天下而事不立天下之所少者非才也氣也何謂氣曰是不可名者也若有鬼神焉而陰相之今夫事之利害計之得失天下之能者舉知之而不能辦能辦其小而不能辦其大則氣有所不足也夫氣之所加則已大而物小於是乎受其至大而不為之驚納其至繁而不為之亂任其至難而不為之憂享其至樂而不為之蕩是氣也受之於天得

之於不可知之間傑然有以蓋天下之人而出萬物之上非有君長之位殺奪施與之權而天下環向而歸之此必有所得者矣多才而敗者世之所謂不幸者也若無能焉而每以成者世之所謂天幸者也夫幸與不幸君子之論不施於成敗之間而施於窮達之際故凡所以成者其氣也其所以敗者其才也氣不能守其才則焉往而不敗世之所以多敗者皆知求其才而不知論其氣也若夫明公其亦有所得矣軾非敢以虛辭而曲

說誠有所見焉耳夫天下有分得其分則安非其分而以一毫取於人則羣起而爭之天下有無窮之利自一命以上至於公相其利可愛其塗甚夷設為科條而待天下之擇取然天下之人翹足企首而羣望之逡巡而不敢進者何也其分有所止也天下有無功而遷一級者則衆指之矣遷者不容於下遷之者不容於上而況其甚者乎明公起於徒步之中執五寸之翰書方尺之簡而列於士大夫之上橫翔捷出冠壓百吏而為之表

猶以為未也而加之師友之職付之全秦之地地方千里則古之方伯連帥所不能有也東障崤澠北跨河渭南倚巴蜀西控戎夏則古之秦昭王商君白起之徒所以殪身殘民百戰而有之者也奮臂而取兩制不十餘年而天下不以為速非有汗馬之勞米鹽之能以擅富貴之美而天下不以為無功抗顏高議自以無前而天下不以為無讓此其氣固有以大服於天下矣天下無大事也天下而有大事非其氣之過人者則誰實辦之

軾遠方之鄙人遊於京師聞明公之風幸其未至於公相而猶可以誦其才氣之盛美而庶幾於知言惜其將遂西去而不得從也故請間於門下以願望見其風采不宣軾再拜

上韓魏公論場務書

軾再拜獻書昭文相公執事軾得從宦於西嘗以為當今制置西事其大者未便非痛整齊之其勢不足以久安未可以隨歌而柱隨壞而補也然而其事宏闊浩汗

非可以倉卒輕言者今之所論特欲救一時之急解朝夕之患耳往者寶元以前秦人之富强可知也中戶不可以畝計而計以頃上戶不可以頃計而計以賦耕於野者不願為公侯藏於民家者多於府庫也然而一經元昊之變冰消火燎十不存三四今之所謂富民者嚮之僕隸也今之所謂蓄聚者嚮之殘棄也然而不知昊賊之遺種其將永世而臣伏邪其亦有時而不臣也以向之民力堅完百倍而不能支以今之傷殘之餘而能

辦者軾所不識也夫平安無事之時不務多方優裕其民使其氣力渾厚足以勝任縣官權時一切之政而欲一旦納之於患難軾恐外憂未去而內憂乘之也鳳翔京兆此兩郡者陝西之橐橐也今使有變則緣邊被兵之郡知戰守而已戰而無食則北守而無財則散使戰不北守不散其權固在此兩郡也軾官於鳳翔見民之所最畏者莫若衙前之役自其家之甕盎釜甑以上計之長役及十千鄉戶及二十千皆占役一分所謂一分

者名為糜錢十千可辦而其實皆十五六千至二十千而多者至不可勝計也科役之法雖始於上戶然至於不足則遞取其次最下至於家貲及二百千者於法皆可科自近歲以來凡所科者鮮有能大過二百千者也夫為王民自甕盎釜鬲以上計之而不能滿二百千則何以為民今也及二百千則不免焉民之窮困亦可知矣然而縣官之事歲以二千四百分為計所謂優輕而可以償其勞也不能六百分而捕獲強惡者願入焉槌

發贓弊者願入焉是二千四百分者衙前之所獨任而
六百分者未能純被於衙前也民之窮困又可知矣今
之最便惟重難日損優輕日增則民尚可以生此軾之
所為區區議以官權與民也其詳固已具於府之所錄
以聞者從軾之說而盡以予民失錢之以貫計者軾嘗
粗較之歲不過二萬失之於酒課而償之於稅緡是二
萬者未得為全失也就使為全失二萬均多補少要以
共足此一轉運使之所辦也如使民日益困窮而無告

異日無以待倉卒意外之患則雖復歲得千萬無益於
敗此賢將帥之所畏也軾以為陛下新御宇內方求所
以為千萬年之計者必不肯以一轉運使之所能辦而
易賢將帥之所畏況於相公才略冠世不牽於俗人之
論乃者變易茶法至今以為不便者十人而九相公尚
不顧行之益堅今此事至小一言可決去歲赦書使官
自買木關中之民始知有生意嚮非相公果斷而力行
必且下三司三司固不許幸而許必且下本路本路下

諸郡或以為可或以為不可然而監司類聚其說而參酌之比復於朝廷固已暮歲矣其行不行又未可知也如此而民何望乎方今山陵事起日費千金軾乃於此時議以官權與民其為迂闊取笑可知矣然竊以為古人之所以大過人者惟能於擾攘急迫之中行寬大閒暇久長之政此天下所以不測而大服也朝廷自數十年以來取之無術用之無度是以民日困官日貧一旦有大故則政出一切不復有所擇此從來不革之過令

日之所宜深懲而永慮也山陵之功不過歲終一切之政當訖事而罷明年之春則陛下逾年即位改元之歲必將首行王道以風天下及今使郡吏議之減定其數當復以聞則言之今其時矣伏惟相公留意千萬幸甚

上蔡省主論放欠書

軾於門下蹤迹絕疎然私自揆度亦似見知於明公者尋常無因緣固不敢造次致書今既有所欲言而又默默拘於流俗人之議以為跡疎不當干說則是謂明公

亦如凡人拘於疎密之分者竊以為不然故輒有所言
不顧惟少留聽軾於府中實掌理欠自今歲麥熟以來
日與小民結為嫌恨鞭笞鑼繫與縣官日得千百錢固
不敢憚也彼實侵盜欺官而不以時償雖日撻無愧然
其間有甚足悲者或管押竹木風水之所漂或主持糧
斛歲久之所壞或布帛惡弱估剝以為虧官或糟泔潰
爛紐計以為實欠或未輸之賦責於當時主典之吏或
敗折之課均於保任干繫之家官吏上下舉知其非辜

而哀其不幸迫於條憲勢不得釋朝廷亦深知其無告也是以每赦必及焉凡令之所追呼鞭撻日夜不得休息者皆更數赦遠者六七赦矣問其所以不得釋之狀則皆曰吾無錢以與三司之曹吏以為不信而考諸舊籍則有事同而先釋者矣曰此有錢者也嗟夫天下之人以為言出而莫敢逆者莫若天子之詔書也今詔書且已許之而三司之曹吏獨不許是猶可忍邪伏惟明公在上必不容此輩故敢以告凡四十六條二百二十

五人錢七萬四百五十九千粟米三千八百三十斛其餘炭鐵器用材木冗雜之物甚衆皆經監司選吏詳定灼然可放者軾已具列聞於本府府當以奏奏且下三司議者皆曰必不報雖報必無決然了絕之命軾以爲不然往年韓中丞詳定放欠以爲赦書所放必待其家業蕩盡以至於干繫保人亦無孑遺可償者又當計赦後月日以爲放數如此則所及甚少不稱天子一切寬貸之意自今苟無所隱欺者一切除免不問其他以此

知今之所奏者皆可放無疑也伏惟明公獨斷而力行之使此二百二十五家皆得歸安其藜糗養其老幼日晏而起吏不至門以歌詠明公之德亦使赦書不為空言而無信者干冒威重退增恐悚

答安師孟書

辱書為貺過厚吾子自以美才積學取榮名於當時所宜德者平生之師友朝夕相與講學者也如軾何與焉然吾子之於軾其得失休戚軾所宜知何者其勢足以

相及也嚮也聞七子者之失恍然如軾之有失也既乃
聞吾子之得則亦如軾之有得也今吾子書來以為自
為喜者少而為軾喜者多甚矣吾子之見愛也然彼七
子者豈以一失為戚哉彼將退治其所有益廣而新之
則吾猶有望焉若吾子既得不驕而日知其所不足則
軾之所得又將有大者也

與曾子固書

軾叩頭泣血言軾負罪至大苟生朝夕不自屏竄輒通

書問於朋友故舊之門者伏念軾逮事祖父祖父之沒
軾年十二矣尚能記憶其為人又嘗見先君欲求人為
撰墓碣雖不指言所屬然私揣其意欲得子固之文也
京師人事擾擾而先君亦不自料止於此嗚呼軾尚忍
言之今年四月軾既護喪還家未葬偶與弟轍閱家中
舊書見先君子自疏錄祖父事迹數紙似欲為行狀未
成者知其意未嘗不在於此也因自思念恐亦一旦卒
然則先君之意永已不遂謹即其遺書粗加整齊為行

狀以授同年兄鄧君文約以告於下執事伏惟哀憐而幸諾之豈惟罪逆遺孤之幸抑先君有知寶寵綏之軾不任哀祈懇切之至

上韓魏公乞葬董傳書

軾再拜近得秦中故人書報進士董傳三月中病死軾往歲官岐下始識傳至今七八年知之熟矣其為人不通曉世事然酷嗜讀書其文字蕭然有出塵之姿至詩與楚詞則求之於世可與傳比者不過數人此固不待

軾言公自知之然傳嘗望公不為力致一官軾私心以
為公非有所愛也知傳所稟付至薄不任官耳今年正
月軾過岐下而傳居喪二曲使人問訊其家而傳徑至
長安見軾於傳舍道其饑寒窮苦之狀以為幾死者數
矣賴公而存又且薦我於朝吾平生無妻近有彭駕部
者聞公薦我許嫁我其妹若免喪得一官又且有妻不
虛作一世入皆公之賜軾既為傳喜且私憂之此二事
生人之常理而在傳則為非常之福恐不能就今傳果

死悲夫書生之窮薄至於如此其極耶夫傳之才器固不通於世用然譬之象犀珠玉雖無補於饑寒要不可使在塗泥中此公所以終薦傳也今父子暴骨僧寺中孀母弱弟自謀口腹不暇決不能葬軾與之故舊在京師者數人相與出錢賻其家而氣力微薄不能有所濟甚可憫笑公若猶憐之不敢望其他度可以葬傳者足矣陳繹學士當往涇州而宋迪度支在岐下公若有以賜之軾且斂衆人之賻并以予陳而致之宋使葬之有

餘以予其家傳平生所為文當使人就其家取之若獲
當獻諸公干冒左右無任戰越

東坡全集卷七十二

欽定四庫全書

東坡全集卷七十三

宋 蘇軾 撰

書十首

上韓丞相論災傷手實書

史館相公執事軾到郡二十餘日矣民物推魯過客稀少真愚拙所宜久處也然災傷之餘民既病矣自入境見民以蒿蔓裹蝗蟲而瘞之道左累累相望者二百餘里捕殺之數聞于官者幾三萬斛然吏皆言蝗不為災

甚者或言為民除草使蝗果為民除草民將祝而來之
豈忍殺乎軾近在錢塘見飛蝗自西北來聲亂浙江之
濤上翳日月下掩草木遇其所落彌望蕭然此京東餘
波及淮浙者耳而京東獨言蝗不為災將以誰欺乎郡
已上章詳論之矣願公少信其言特與量蠲秋稅或與
倚閣青苗錢疎遠小臣腰領不足以薦鉞鉞豈敢以非
災之蝗上罔朝廷乎若必不信方且重復檢按則饑羸
之民索之於溝壑間矣且民非獨病旱蝗也方田均稅

之患行道之人舉知之稅之不均也久矣然而民安其
舊無所歸怨今乃用一切之法成於朞月之間奪甲與
乙其不均又甚於昔者而民之怨始有所歸矣今又行
手實之法雖其條目委曲不一然大抵恃告訐耳昔之
為天下者惡告訐之亂俗也故有不干已之法非盜及
強姦不得捕告其後稍稍失前人之意漸開告訐之門
而今之法揭賞以求人過者十常八九夫告訐之人未
有非凶姦無良者異時州縣所共疾惡多方去之然後

良民乃得而安今乃以厚賞招而用之豈吾君敦化相
公行道之本意歟凡為此者欲以均出役錢耳免役之
法其經久利病軾所不敢言也朝廷必欲推而行之尚
可擇其簡易為害不深者軾以為定簿便當即用五等
古法惟第四等五等分上中下昔之定簿者為役役未
至雖有不當民不爭也役至而後訴耳故簿不可用今
之定簿者為錢民知當戶出錢也則不容有大繆矣其
名次細別或未盡其詳然至於等第蓋已略得其實軾

以為如是足矣但當先定役錢所須幾何預為至少之

數以賦其下五等

下五等謂第四等上中下第五等上中也此五等舊役至輕須令出錢至

少乃可第五等下更不當出分文

其餘委自令佐度三等以上民力之

所任者而分與之夫三等以上錢物之數雖其親戚不能周知至於物力之厚薄則令佐之稍有才者可以意度也借如某縣第一等凡若干戶度其力共可以出錢若干則悉召之庭以其數予之不戶別也令民自相差擇以次分占盡數而已第二等則逐鄉分之凡某鄉之

第二等若干戶度其力可以共出錢若干召而分之如
第一等第三等亦如之彼其族居相望貧富相悉利害
相形不容獨有僥倖者也相推相詰不一二日自定矣
若析戶則均分役錢典賣則著所割役錢於契要使其
子孫與買者各以其名附舊戶供官至三年造簿則不
復用舉從其新如此而朝廷又何求乎所謂浮財者決
不能知其數凡告者亦意之而已意之而中其賞不貲
不中杖六十至八十極矣小人何畏而不為乎近者軍

器監須牛皮亦用告賞農民喪牛甚於喪子老弱婦女之家報官稍緩則撻而責之錢數十千以與浮浪之人其歸為牛皮而已何至是乎軾在錢塘每執筆斷犯鹽者未嘗不流涕也自到京東見官不賣鹽獄中無鹽囚道上無遷鄉配流之民私竊喜幸近者復得漕檄令相度所謂王伯瑜者欲變京東河北鹽法置市易鹽務利害不覺慨然太息也密州之鹽歲收稅錢二千八百餘萬為鹽一百九十餘萬秤此特一郡之數耳所謂市易

鹽務者度能盡買此乎苟不能盡民肯捨而不煎煎而不私賣乎頃者兩浙之民以鹽得罪者歲萬七千人終不能禁京東之民悍於兩浙遠甚恐非獨萬七千人而已縱使官能盡買又須盡賣而後可苟不能盡其存者與糞土何異其害又未可以一二言也願公救之於未行若已行其孰能已之軾不敢論事久矣今者守郡民之利病其勢有以見及又聞自京師來者舉言公深有拯救斯民為社稷長計遠慮之意故不自揆復發其狂

言可則行之否則置之願無聞於人使孤危衰廢之蹤重得罪於世也干冒威重不勝戰慄

上文侍中論強盜賞錢書

軾再拜軾備員偏州民事甚簡但風俗武悍特好強劫加以比歲荐饑推剽之姦殆無虛日自軾至此明立購賞隨獲隨給人用競勸盜亦斂迹準法獲強盜一人至死者給五十千流以下半之近有旨災傷之歲皆降一等既降一等則當復減半自流以下得十二千五百而

已凡獲一賊告與捕者率常不下四五人不勝則為盜
所害幸而勝則凡為盜者舉讐之其難如此而使四五
人者分十二千五百以損其軀命可乎朝廷所以深惡
強盜者為其志不善張而不已可以馴致勝廣之資也
由此言之五十千豈足道哉夫災傷之歲尤宜急於盜
賊今歲之民上戶皆闕食冬春之交恐必有流亡之憂
若又蹤盜而不捕則郡縣之憂非不肖所能任也欲具
以聞上而人微言輕恐不見省向見報明公所言無不

立從東武之民雖非所部明公以天下為度必不間也
故敢以告此來士大夫好輕議舊法皆未習事之人知
其一不知其二者也常竊怪司農寺所行文書措置郡
縣事多出於本寺官吏一時之意遂與制勅並行近者
令諸郡守根究衙前重難應緣此毀棄官文書者皆科
違制且不用赦降原免考其前後初不被旨謹按律文
毀棄官文書重害者徒一年令科違制即是增損舊律
令也不用赦降原免即是衝改新制書也豈有增損舊

律令衝改新制書而天子不知三公不與有司得專之者今監司郡縣皆恬然受而行之莫敢辨此軾之所深不識也昔袁紹不肯迎天子以謂若迎天子以自近則每事表聞從之則權輕不從則拒命非計之善也夫不請而行袁紹之所難也而况守職奉上者乎今聖人在上朝廷清明雖萬無此虞司農所行意其出於偶然或已嘗被旨而失於開坐皆不可知但不請而行其漸不可開耳軾愚蠢無狀孤危之跡自以岌岌夙蒙明公獎

與過分竊懷憂國之心聊復一發於左右猶幸明公密之無重其罪戾也

上文侍中論權鹽書

留守侍中執事當今天下勲德俱高為主上所倚信華實兼隆為士民所責望受恩三世宜與社稷同憂皆無如明公者今雖在外事有關於安危而非職之所憂者猶當盡力爭之而況其事關本職而憂及生民者乎竊意明公必已言之而人不知若猶未也則願效其愚頃

者三司使章惇建言乞權河北京東鹽朝廷遣使案視
召周革入覲已有成議矣惇之言曰河北與陝西皆為
邊防而河北獨不權鹽此祖宗一時之誤恩也軾以為
陝西之鹽與京東河北不同解池廣袤不過數十里既
不可捐以予民而官亦易以籠取青鹽至自敵中有可
禁止之道然猶法存而實不行城門之外公食青鹽今
東北循海皆鹽也其欲籠而取之正與淮南兩浙無異
軾在餘杭時見兩浙之民以犯鹽得罪者一歲至萬七

千人而莫能止姦民以兵仗護送吏士不敢近者常以數百人為輩特不為他盜故上下通知而不以聞耳東北之人悍於淮浙遠甚平居椎剽之姦常甲於他路一旦摧鹽則其禍未易以一二數也由此觀之祖宗以來獨不摧河北鹽者正事之適宜耳何名為誤哉且摧鹽雖有故事然要以為非王政也陝西淮浙既未能罷又欲使京東河北隨之此猶患風痺人曰吾左臂既病矣右臂何為獨完則以酒色伐之可乎今議者曰吾之法

與淮浙不同淮浙之民所以不免於私販而竈戶所以不免於私賣者以官之買價賤而賣價貴耳今吾賤買而賤賣借如每斤官以三錢得之則以四錢出之鹽商私買於竈戶利其賤耳賤不能減三錢竈戶均為得三錢也寧以予官乎將以予私商而犯法乎此必不犯之道也此無異於兒童之見東海皆鹽也苟民力之所及未有捨而不煎煎而不賣者也而近歲官錢常若窘迫遇其急時百用橫生以有限之錢買無窮之鹽竈戶有

朝夕薪米之憂而官錢在朞月之後則其利必歸於私
販無疑也食之於鹽非若饑之於五穀也五穀之乏至
於節口并日而况鹽乎故私販法重而官鹽貴則民之
貧而懦者或不食鹽往在浙中見山谷之人有數月食
無鹽者今將權之東北之俗必不如往日之嗜鹹也而
望官課之不虧疎矣且淮浙官鹽本輕而利重雖有積
滯官未病也今以三錢為本一錢為利自祿吏購賞修
築廩庾之外所獲無幾矣一有積滯不行官之所喪可

勝計哉失民而得財明者不為況民財兩失者乎且禍
莫大於作始作俑之漸至於用人今兩路未有鹽禁也
故變之難遣使會議經年而未果自古作事欲速而不
取衆議未有如今日者也然猶遲久如此以明作始之
難也今既已權之矣則他日國用不足添價貴賣有司
以為熟事行半紙文書而決矣且明公能必其不添乎
非獨明公不能也今之執政能自必乎苟不可必則兩
路之禍自今日始夫東北之蠶衣被天下蠶不可無鹽

而議者輕欲奪之是病天下也明公可不深哀而速救之歟或者以為朝廷既有成議矣雖爭之必不從竊以為不然乃者手實造簿方赫然行法之際軾嘗論其不可以告令太原韓公公時在政府莫之行也而手實卒罷民賴以少安凡今執政所欲必行者青苗助役市易保甲而已其他猶可以庶幾萬一或者又以為明公將老矣若猶有所爭則其請老也難此又軾之所不識也使明公之言幸而聽屈已少留以全兩路之民何所不

可不幸而不聽是議不中意其於退也尤易矣願少留意軾一郡守也猶以為職之所當憂而冒聞於左右明公其得已乎干瀆威重俯伏待罪而已

答舒煥書

軾頓首軾天資懶慢自少年筋力有餘時已不喜應接人事其於酬酢往反蓋嘗和矣而未嘗敢倡也近日加之衰病向所謂和者又不能給雖知其勢必為人所怪怒但弛廢之心不能自克聞足下之賢久矣又知守官

不甚相遠加之往來者具道足下雖未相識而相與之意甚厚亦欲作一書相聞然操筆復止者數矣因與賈君飲出足下送行一絕句其語有見及者醉中率爾和答醒後不復記憶其中道何等語也忽辱手示乃知有公沙之語惘然如夢中事愧赧不已足下文章之美固已超軼世俗而追配古人矣豈僕荒唐無實橫得聲名者所得眩乎何其稱述之過也其詞則信美矣豈效鄒衍相如高談馳騁不顧其實苟欲託僕以發其宏麗新

語耶歐陽公天人也恐未易過非獨不肖所不敢當也
天之生斯人意其甚難非且使之休息千百年恐未能
復生斯人也世人或自以為似之或至以為過之非狂
則愚而已何緣會面一笑為樂朱文使行忽遽裁謝草
草

答黃魯直書

軾頓首再拜魯直教授長官足下軾始見足下詩文於
孫莘老之坐上聳然異之以為非今世之人也莘老言

此人人知之者尚少子可為稱揚其名軾笑曰此人如
精金美玉不即人而人即之將逃名而不可得何以我
稱揚為然觀其文以求其為人必輕外物而自重者今
之君子莫能用也其後過李公擇於濟南則見足下之
詩文愈多而得其為人益詳意其超逸絕塵獨立萬物
之表馭風騎氣以與造物者遊非獨今世之君子所不
能用雖如軾之放浪自棄與世闊疎者亦莫得而友也
今者辱書詞累幅執禮恭甚如見所畏者何哉軾方以

此求交於足下而懼其不可得豈意得此於足下乎喜愧之懷殆不可勝然自入夏以來家人輩更卧病忽忽至今裁答甚緩想未深訝也古風二首託物引類真得古詩人之風而軾非其人也聊復次韻以為一笑秋暑不審起居何如未由會見萬萬以時自重

答宋寺丞書

軾自假守彭城即欲為一書以問左右久苦多事竟為足下所先慚悚不可言也來書稱道過當皆非無狀所

能髣髴自少小為學不過以記誦篆刻追世俗之好真
所謂淺見寡聞者也年大以來雖所謂寡淺者亦復廢
忘至於吏道法令民事簿書期會尤非所長素又不喜
從事於此以不喜之心強其所不長其荒唐謬悠可知
也而彭城自漢以來號為重地朝廷過采其虛名不知
其實無有也而輕以畀之自到郡以來夏旱秋潦繼之
以橫流之災札瘥之餘百役毛起公私騷然未已也計
其不治之聲聞於左右者多矣仁人君子不指其過教

其所不迫而更譽之何也孔子曰居是邦也事其大夫之賢者友其士之仁者自今與足下往來相聞知不徒為好而已當有以告我者不勝大願適會夫役起無頃刻閒暇書不能盡意惟深察之

黃州上文潞公書

軾再拜孟夏漸熱恭惟留守太尉執事台候萬福承以元功正位兵府備物典冊首冠三公雖曾孫之遇絕口不言而金縢之書因事自顯真古今之異事聖朝之光

華也有自京師來轉示所賜書教一通行草爛然使破
甌敝帚復增九鼎之重軾始得罪倉皇出獄死生未分
六親不相保然私心所念不暇及他但顧平生所存名
義至重不知今日所犯為已見絕於聖賢不得復為君
子乎抑雖有罪不可赦而猶可改也伏念五六日至于
旬時終莫能決輒復強顏忍耻飾鄙陋之詞道疇昔之
眷以卜於左右遽辱還答恩禮有加豈非察其無他而
恕其不及亦如聖天子所以貸而不殺之意乎伏讀洒

然知其不肖之軀未死之間猶可以洗濯磨治復入於道德之場追申徒而謝子產也軾始就逮赴獄有一子稍長徒步相隨其餘守舍皆婦女幼稚至宿州御史符下就家取文書州郡望風遣吏發卒圍船搜取老幼幾怖死既去婦女恚罵曰是好著書書成何所得而怖我如此悉取燒之比事定重復尋理十亡其七八矣到黃州無所用心輒復覃思於易論語端居深念若有所得遂因先子之學作易傳九卷又自以意作論語說五卷

窮苦多難壽命不可期恐此書一旦復淪沒不傳意欲
寫數本留人間念新以文字得罪人必以為凶衰不祥
之書莫肯收藏又自非一代偉人不足託以必傳者莫
若獻之明公而易傳文多未有力裝寫獨致論語說五
卷公退閒暇一為讀之就使無取亦足見其窮不忘道
老而能學也軾在徐州時見諸郡盜賊為患而察其人
多凶俠不遜因之以饑饉恐其憂不止於竊攘剽殺也
輒草具其事上之會有旨移湖州而止家所藏書既多

亡軼而此書本以為故紙糊籠篋獨得不燒籠破見之不覺惘然如夢中事輒錄其本以獻軾廢逐至此豈敢復言天下事但惜此事粗有益於世既不復施行猶欲公知之此則宿昔之心掃除未盡者也公一讀訖即燒之而已黃州食物賤風土稍可安既未得去去亦無所歸必老於此拜見無期臨紙於邑惟冀以時為國自重

謝張太保撰先人墓碣書

軾頓首再拜伏蒙再示先人墓表特載辨姦一篇恭覽

涕泗不知所云竊惟先人早歲汨沒晚乃有聞雖當時
學者知師尊之然於其言語文章猶不能盡而況其中
之不可形者乎所謂知之盡而信其然者舉世惟公一
人雖若不幸然知我者希正老氏之所貴辨姦之始作
也自軾與舍弟皆有嘻其甚矣之諫不論他人獨明公
一見以為與我意合公固已論之先朝載之史冊今雖
容有不知後世決不可沒而先人之言非公表而出之
則人未必信信不信何足深計然使斯人用區區小數

以欺天下天下莫覺莫知恐後世必有秦無人之嘆此墓表之所以作而軾之所以流涕再拜而謝也黃叔度澹然無作郭林宗一言至今以為顏子林宗於人材小大畢取所賢非一人而叔度之賢無一見於外者而後世猶信徒以林宗之重也今公之重不減林宗所賢惟先人而其心迹粗若可見其信於後世必矣多言何足為謝聊發一二

與章子厚書

子厚參政諫議執事春初辱書尋通中裁謝不審得達
否此日機務之暇起居萬福軾蒙恩如昨顧以罪廢之
餘人所鄙惡雖公不見棄亦不欲頻通姓名今茲復陳
區區誠義有不可已者軾在徐州日聞沂州丞縣界有
賊何九郎者謀欲劫利國監又有闕溫秦平者皆猾賊
往來沂沭間欲使人緝捕無可使者聞沂州葛墟村有
程棐者家富有心膽其弟岳坐與李逢往還配桂州牢
城棐雖小人而篤於兄弟常欲為岳洗雪而無由竊意

其人可使因令本州支使孟易呼至郡喻使自效以刷門戶垢汙苟有成績當為奏乞放免其弟棐願盡力因出帖付與不逾月軾移湖州棐相送出境云公更留兩月棐必有以自效今已去奈何軾語棐但盡力不可以軾去而廢也苟有所獲當速以相報不以遠近所在仍為奏乞如前約也是歲七月二十七日棐使人至湖州見報云已告捕獲妖賊郭先生等及得徐州孔目官以下狀申告捕妖賊事如棐言不謬軾方欲具始末奏陳

棐所以盡力者為其弟也乞勘會其弟岳所犯如只是
與李逢往還本不與其謀者乞賜放免以勸有功草具
未上而軾就逮赴詔獄遂不果發今者棐又遣人至黃
州見報云郭先生等皆已鞫治得實行法久矣蒙恩授
殿直且錄其告捕始末以相示原棐之意所以孜孜於
軾者凡為其弟以曩言見望也軾固不可以復有言矣
然獨念愚夫小人以一言感發猶能奮身不顧以遂其
言而軾乃以罪廢之故不為一言以負其初心獨不愧

乎且其弟岳亦豪健絕人者也徐沂間人驚勇如裴岳類甚衆若收拾驅使令捕賊即作賊耳謂宜因事勸獎使皆歆艷捕告之利懲創為盜之禍庶幾少變其俗今裴必在京師參班公可自以意召問其始末特為一言放免其弟岳或與一名目牙校鎮將之類付京東監司驅使緝捕其才用當復過於裴也此事至微末公執政大臣豈復治此但裴於軾本非所部吏民而能自效者以軾為不食言也今既不可言於朝廷又不一言於

公是終不言矣以此愧於心不能自己可否在公獨願
秘其事毋使軾重得罪也徐州南北襟要自昔用武之
地而利國監去州七十里土豪百餘家金帛山積三十
六冶器械所產而兵衛微寡不幸有猾賊十許人一呼
其間吏兵皆棄而走耳散其金帛以嘯召無賴烏合之
衆可一日得也軾在郡時常令三十六冶每戶點集冶
夫數十人持却刃槍每月兩衙於知監之庭以示有備
而已此地蓋常為京東豪猾之所擬公所宜知因程棐

事輒復及之秋冷伏冀為國自重


答李端叔書一首

軾頓首再拜聞足下名久矣又於相識處往往見所作詩文雖不多亦足以髣髴其為人矣尋常不通書問怠慢之罪猶可闊畧及足下斬然在疚亦不能以一字奉慰舍弟子由至先蒙惠書又復懶不即答頑鈍廢禮一至於此而足下終不棄絕適中再辱手書待遇益隆覽之面熱汗下也足下才高識明不應輕許與人得非用

黃魯直秦太虛輩語真以為然耶不肖為人所憎而二子獨喜見譽如人嗜昌歆羊棗未易詰其所以然者以二子為妄則不可遂欲以移之衆口又大不可也軾少年時讀書作文專為應舉而已既及進士第貪得不已又舉制策其實何所有而其科號為直言極諫故每紛然誦說古今考論是非以應其名耳人苦不自知既以此得因以為實能之故譏譏至今坐此得罪幾死所謂齊虜以口舌得官真可笑也然世人遂以軾為欲立異

同則過矣妄論利害撓說得失此正制科人習氣譬之
候蟲時鳥自鳴自己何足為損益軾每怪時人待軾過
重而足下又復稱說如此愈非其實得罪以來深自閉
塞扁舟草履放浪山水間與樵漁雜處往往為醉人所
推罵輒自喜漸不為人識平生親友無一字見及有書
與之亦不答自幸庶幾免矣足下又復創相推與甚非
所望木有癭石有暈犀有通以取妍於人皆物之病也
謫居無事默自觀省回視三十年以來所為多其病者

足下所見皆故我非令我也無乃聞其聲不考其情取其華而遺其實乎抑將又有取於此也此事非相見不能盡自得罪後不敢作文字此書雖非文然信筆書意不覺累幅亦不須示人必喻此意歲行盡寒苦惟萬萬節哀強食不次



東坡全集卷七十三

欽定四庫全書

集部

東坡全集卷七十四

詳校官庶吉士臣謝恭銘

檢討臣何思鈞覆勘

總校官進士臣朱鈐

校對官中書臣高 中

謄錄監生臣許思光

欽定四庫全書

東坡全集卷七十四

宋 蘇軾 撰

書九首

答秦太虛書

軾啓五月末舍弟來得手書勞問甚厚日欲裁謝因循至今遞中復辱教感愧益甚比日履茲初寒起居何如軾寓居粗遣但舍弟初到筠州即喪一女子而軾亦喪一老乳母悼念未衰又得鄉信堂兄中舍九

月中逝去異鄉哀病觸目悽感念人命脆弱如此又承見喻中間得疾不輕且喜復健吾儕漸衰不可復作少年調度當速用道書方士之言厚自養鍊謫居無事頗窺其一二已借得本州大慶觀道堂三間冬至後當入此室四十九日乃出自非廢放安得就此太虛他日一為仕官所縻欲求四十九日閒豈可復得耶當及今為之但擇平時所謂簡要易行者日夜為之寢食之外不治他事但滿此期根本立矣此後

縱復出從人事事已則心返自不能廢矣此書到日
恐已不及然亦不須用冬至也寄示詩文皆超然勝
絕臺臺焉來逼人矣如我輩亦不勞逼也太虛未免
求祿仕方應舉求之應舉不可必竊為君謀宜多著
書如所示論兵及盜賊等數篇但似此得數十首當
卓然有可用之實者不須及時事也但旋作此書亦
不可廢應舉此書若成聊復相示當有知君者想喻
此意也公擇近過此相聚數日說太虛不離口莘老

未嘗得書知未暇通問程公闢須其子履中哀詞軾
本自求作今豈可食言但得罪以來不復作文字自持
頗嚴若復一作則決壞藩牆今後仍復衮衮多言矣初
到黃廩入既絕人口不少私甚憂之但痛自節儉日用
不得過百五十每月朔便取四千五百錢斷為三十塊
掛屋梁上平旦用畫叉挑取一塊即藏去又仍以大竹
筒別貯用不盡者以待賓客此賈耘老法也度囊中尚
可支一歲有餘至時別作經畫水到渠成不須預慮以

此胸中都無一事所居對岸武昌山水佳絕有蜀人王
生在邑中往往為風濤所隔不能即歸則王生能為殺
雞炊黍至數日不厭又有潘生者作酒店樊口棹小舟
徑至店下村酒亦自醇釀柑橘枳極多大芋長尺餘
不減蜀中外縣米斗二十有水路可致羊肉如北方豬
牛麀鹿如土魚蟹不論錢岐亭監酒胡定之載書萬卷
隨行喜借人看黃州曹官數人皆家善庖饌喜作會太
虛視此數事吾事豈不既濟矣乎欲與太虛言者無窮

但紙盡耳展讀至此想見掀髯一笑也子駿固吾所畏
其子亦可喜曾與相見否此中有黃岡少府張舜臣者
其兄堯臣皆云與太虛相熟兒子每蒙批問適會葬老
乳母今勾當作墳未暇拜書歲晚苦寒惟萬萬自重李
端叔一書託為達之夜中微被酒書不成字不罪不罪
不宣軾再拜

答李琮書

軾啟奉別忽然半年思仰無窮近聞公有閨門之戚即

欲作書奉慰既罕遇的便又以為書未必能開釋左右
往往更益悽悵用是稍緩今辱手教慙負不已竊計高
懷遠度必已超然此等情累隨手掃滅猶恐不脫若更
反覆尋繹便纏繞人矣望深以明識照之軾凡百如昨
愚暗少慮輒復隨緣自娛自夏至後杜門不出惡熱不
可過所居又向西多勸遷居遷居非月餘不能定而熱
向衰矣亦復不果如聞公以職事當須一赴闕不知果
然否承問及王天常奉職所言邊事天常父齊雄結髮

與西南夷戰夷人信畏之天常幼隨其父入夷中近歲
王中正入蜀亦令天常招撫近界諸夷夷人以其齊雄
子亦信用其言向嘗與軾言瀘州事所以致甫望乞弟
作過如此者皆有條理可聽然皆已往之事雖知之無
補又似言人長短故不復錄呈獨論今日事勢揣量夷
人情偽似有本末天常正月中與軾言播州首領楊貴
遷者俗謂之楊通判最近烏蠻而梟武可用又有宋大
郎者乞弟之死黨凶猾有謀略若官中見委說楊貴遷

令殺宋大郎必可得也數日前有從蜀中來者言貴遷
已殺宋大郎納其首級與銀三千兩以此推之天常之
言殆不妄也天常言晏州六縣水路十二村諸夷世與
乞弟為仇向者熊察訪誘殺十二村首領及近歲韓存
寶討殺羅狗姓諸夷皆有唇齒之憂貌畏而心貳去年
乞弟領兵至羅介年屯殺害兵官王宣等十二人其地
去寧遠安夷寨至近涉歷諸夷族帳不少自來自去殊
無留難若諸夷不心與之其勢必不能如此也今欲討

乞弟必先有以懷結近界諸夷得其心腹而後可今韓存寶等諸軍既不敢與乞弟戰但翱翔於近界百餘里間多殺不作過熟戶老弱而厚以金帛遺乞弟且遣四人為質然後得乞弟遣人送一封空降書便與約誓即日班師與運司諸君皆上表稱賀上深照其實已降手詔械存寶獄中遠人無不歡快以謂雖漢光武唐太宗料敵察情於萬里之外不能過也今雖已械存寶而後來者亦未見有精巧必勝之術但言乞弟不過有兵三

千而官軍無慮三萬何往而不克此正如千鈞車弩可
以洞犀象而不可以得鼠耳今糧運止於江安縣自江
安至乞弟住坐處猶須十二三程吏士以糗餌行其勢
不能過一月乞弟但能深自避匿四五十日則免矣而
山谷幽險林木沮洳賊於溪谷間依叢木自蔽以藥箭
射人血濡縷立死戰士數萬人知深入未為萬全而將
吏不敢復稽留此間事不可不深慮天常言國之用兵
正如私家之造屋凡屋若干材石之費穀米之用為錢

若干布筭而定無所贏縮矣工徒入門斧斤之聲鏗然而百用毛起不可復計此慮不素定之過也既作而復聚糧既斷而復求材其費必十倍其工必不堅故王者之兵當如富人之造屋其慮周其規摹素定其取材積糧皆有方故其經營之常遲而其作之常速計日而成不愆于素費半他人而工必倍之今日之策可且罷諸將兵獨精選一轉運使及一瀘州知府許法外行事與二年限令經畫處置他人更不得與多出錢物茶絲於

沿邊博買夷人糧米其費必減倉卒夫運之半使辨士
招說十州五團晏州六縣水路十二村羅氏鬼主播州
楊貴遷之類作五六頭項更番出兵以蹂踐乞弟族帳
使春不得耕秋不得穫又嘉戎瀘渝四州皆有土豪為
把截將自來雇一私兵入界用銀七百兩每得一番人頭
用銀三十兩買之把截將自以為功今可召募此四州
人每得二十級即與補一三班差使如不及二十級即
每級官與絹三十匹出入山谷耐辛苦瘴毒見利則雲

合敗則鳥獸散此本蠻夷之所長而中原之所無奈何也今若召募諸夷及四州把截將私兵使更出迭入則蠻夷之所長我反用之但能積日累月戕殺其丁壯且使終年釋耒而操兵不及二年其族帳必殺乞弟以降如其未也則乞朝廷差三五百人將下選兵三路入界西路自江安縣進兵先積糧於寧遠寨以十州五團等諸夷為先鋒以施黔戎瀘四州藥箭弩手繼之中路自納溪寨進兵先積糧於本寨亦以諸夷為先鋒以將下

兵馬繼之三路中惟此路稍平可以用官軍東路自合
江縣進兵先積糧於安溪寨亦以諸夷為先鋒以嘉戎
瀘渝四州召募人繼之可以一舉而蕩滅也天常此策
雖若不快以蕞爾小醜二年而後定然王者之兵必出
於萬全不可以僥倖淮南王安有言廝輿之卒有一不
備而歸者雖得越王之首臣猶竊為大漢羞之今乞弟
譬猶蚤蝨也克之未足以威四夷萬一不克豈不為卿
大夫之辱也哉趙克國征先零鄧訓征羌及月支胡皆

以計磨之數年乃克唐明皇欲取石堡城王忠嗣不奉
詔以謂非殺二萬人不可取方唐之盛二萬人豈足道
哉而賢將謀國終不肯出此者圖萬全也又漢永和中
交趾反議者欲發荆揚兗豫四萬人討之獨李固以謂
四州之人遠赴萬里無有還期詔書迫促必致叛亡南
州瘟疫死者必多士卒疲勞比至嶺南不復堪鬪前中
即將尹就討益州叛羌益州諺曰虜來尚可尹來殺我
後以兵付刺史張喬因其將吏旬月之間破殄寇虜此

發將無益州郡可任之明效也今可募蠻夷使自相攻
轉輸金帛以為其資有能反間致頭首者許以封侯之
賞因舉祝良為九真太守張喬為交趾刺史由此嶺外
悉平今觀其說乃與天常之言若合符節但天常不學
言不能起意耳天常又言烏蠻藥箭中者立死無脫理
然不能及遠非三十步內不發發無不中今與烏蠻戰
當於百步以下五六十步以上強弓勁弩射之若稍近
則短兵徑進於五七步內相格則其長技皆廢今乞弟

亦未是正烏蠻也諸如此巧便非一不能盡錄略舉一
二以見天常之練習疑可驅使耳又有一圖子雖不甚
詳密然大略具是矣按圖以考其說差若易了故以奉
呈看訖可却付去人見還也此非公職事然孜孜尋訪
如此以見忠臣體國知無不為之義也軾其可以罪廢
不當言而止乎雖然亦不可使不知我者見以為詬病
也知荆公見稱經藏文是未離妄語也便蒙印可何哉
圓覺經紙示及得暇為寫下卷今公擇寫上卷秦太虛

維揚勝士固知公喜之無乃亦可令荆公一見之歟子
駿初見報奪一官耳不知其罷郡能不鬱鬱否有一書
不知其今安在敢煩左右達之江水比去年甚大郡中
不為患見說沙湖鎮頗浸居民亦江淮間常事耳臨臯
港既開往來蒙利無窮而居民貿易之入亦不貲但不
免少有淤填議者謂歲發少春夫淘之甚易承問輒及
之未緣展奉惟冀以時自重謹奉手啟起居熱甚幸恕
不謹軾頓首再拜

荅陳師仲書

軾頃首再拜錢塘主簿陳君足下曩在徐州得一再見
及見顏長道輩皆言足下文詞卓偉志節高亮固欲朝
夕相從適會訟訴偶有相關及者遂不復往來此自足
下門中不幸亦豈為吏者所樂哉想彼此有以相照已
而軾又負罪遠竄流離契闊益不復相聞今者蒙書教
累幅相屬之厚又甚於昔者知足下釋然果不以前事
介意幸甚幸甚自得罪後雖平生厚善有不敢通問者

足下獨犯衆人之所忌何哉及讀所惠詩文不數篇輒拊掌太息此自世間奇男子豈可以世俗趣舍量其心乎詩文皆奇麗所寄不齊而皆歸合於大道軾又何言者其間十常有四五見及或及舍弟何相愛之深也處世齟齬每深自嫌惡不論他人及見足下輩猶如此輒亦少自赦詩能窮人所從來尚矣而於軾特甚今足下獨不信建言詩不能窮人為之益力其詩日已工其窮殆未可量然亦在所用而已不龜手之藥或以封安知

足下不以此達乎人生如朝露意所樂則為之何暇計
議窮達云能窮人者固繆云不能窮人者亦未免有意
於畏窮也江淮間人好食河豚每與人爭河豚本不殺
人嘗戲之性命自子有美則食之何與我事今復以此
戲足下想復千里為我一笑也先吏部詩幸得一觀輒
題數字繼諸公之末見為編述超然黃樓二集為賜尤
重從來不曾編次縱有一二在者得罪日皆為家人婦
女輩焚毀盡矣不知今乃在足下處當為刪去其不合

道理者乃可存耳軾於錢塘人有何恩意而其人至今
見念軾亦一歲率常四五夢至西湖上此殆世俗所謂
前緣者在杭州嘗遊壽星院入門便悟曾到能言其院
後堂殿山石處故詩中嘗有前生已到之語足下主簿
於法得出入當復縱游如軾在彼時也山水窮絕處往
往有軾題字想復題其後足下所至詩但不擇古律以
日月次之異日觀之便是行記有便以一二見寄慰此
惘惘其餘慎疾自重不宣軾頓首再拜

荅畢仲舉書

軾啟奉別忽十餘年愚瞽頓仆不復自比於朋友不謂
故人尚爾記錄遠枉手教存問甚厚且審比來起居住
勝慰慰不可言羅山素號善地不應有瘴癘豈歲時適
爾既無所失亡而有得於齊寵辱忘得喪者是天相子
也僕既以任意直前不用長者所教以觸罪咎然禍福
要不可推避初不論巧拙也黃州濱江帶山既適耳目
之好而生事百須亦不難致早寢晚起又不知所謂禍

福果安在哉偶讀戰國策見處士顏蠋之語晚食以當
肉欣然而笑若蠋者可謂巧於居貧者也菜羹菽豢差
饑而食其味與八珍等而既飽之餘芻豢滿前惟恐其
不持去也美惡在我何與於物所云讀佛書及合藥救
人二事以為閒居之賜甚厚佛書舊亦嘗看但閤塞不
能通其妙獨時取其粗淺假說以自洗濯若農夫之去
草旋去旋生雖若無益然終愈於不去也若世之君子
所謂超然玄悟者僕不識也往時陳述古好論禪自以

為至矣而鄙僕所言為淺陋僕嘗語述古公之所談譬
之飲食龍肉也而僕之所學猪肉也猪之與龍則有間
矣然公終日說龍肉不如僕之食猪肉實美而真飽也
不知君所得於佛書者果何耶為出生死超三乘遂作
佛乎抑尚與僕輩俯仰也學佛老者本期於靜而達靜
似懶達似放學者或未至其所期而先得其所似不為
無害僕常以此自疑故亦以為獻來書云處世得安穩
無病粗衣飽飯不造冤業乃為至足三復斯言感歎無

窮世人所作舉足動念無非是業不必刑殺無罪取非
其有然後為冤業也無緣面論以當一笑而已

與朱鄂州書

軾啟近遞中奉書必達比日春寒起居何似昨日武昌
寄居王殿直天麟見過偶說一事聞之酸辛為食不下
念非吾康叔之賢莫足告語故專遣此人俗人區區了
眼前事救過不暇豈有餘力及此度外事乎天麟言岳
鄂間田野小人例只養二男一女過此輒殺之尤諱養

女以故民間少女多鰥夫初生輒以冷水浸殺其父母亦不忍率常閉目背面以手按之水盆中呻吟良久乃死有神山鄉百姓石揆者連殺兩子去歲夏中其妻一產四子楚毒不可堪忍母子皆斃報應如此而愚人不知創父天麟每聞其側近有此輒馳救之量與衣服飲食全活者非一既旬日有無子息人欲乞其子者輒亦不肯以此知其父子之愛天性故在特牽於習俗耳聞鄂人有秦光亨者今已及第為安州司法方其在母也

其舅陳遵夢一小兒挽其衣若有所訴比兩夕輒見之
其狀甚急遵獨念其姊有娠將產而意不樂多子豈其
應是乎馳往省之則兒已在水盆中矣救之得免鄂人
戶知之準律故殺子孫徒二年此長吏所得按舉願公
明以告諸邑令佐使召諸保正告以法律諭以禍福約
以必行使歸轉以相語仍錄條粉壁曉示且立賞召人
告官賞錢以犯人及隣保家財充若客戶則及其地主
婦人懷孕經涉歲月隣保地主無不知者若後殺之其

勢足相舉覺容而不告使出賞固宜若依律行遣數人此風便草公更使令佐各以至意誘諭地主豪戶若實貧甚不能舉子者薄有以賙之人非木石亦必樂從但得初生數日不殺後雖勸之使殺亦不肯矣自今以往緣公而得活者豈可勝計哉佛言殺生之罪以殺胎卵為最重六畜猶爾而況於人俗謂小兒病為無辜此真可謂無辜矣悼耄殺人猶不死況無罪而殺之乎公能生之於萬死中其陰德十倍於雪活壯夫也昔王濬為

巴郡太守巴人生子皆不舉濬嚴其科條寬其徭役所
活數千人及後伐吳所活者皆堪為兵其父母戒之曰
王府君生汝汝必死之古之循吏如此類者非一居今
之世而有古循吏之風者非公而誰此事特未知耳軾
向在密州遇饑年民多棄子因盤量勸誘米得出剩數
百石別儲之專以收養棄兒月給六斗比暮年養者與
兒皆有父母之愛遂不失所所活亦數十人此等事在
公如反手耳恃深契故不自外不罪不罪此外惟為民

自重不宣軾再頓首

荅李昭玘書

軾啟向得王子中兄弟書具道足下每相見語輒見及意相予甚厚即欲作書以道區區又念方以罪垢廢放平生不相識而相向如此此人必有以不肖欺左右者軾所以得罪正坐名過實耳年大以來平日所好惡憂畏皆衰矣獨畏過實之名如畏虎也以此未敢相聞今獲來書累幅首尾句句皆所畏者謹再拜辭避不敢當

然少年好文字雖自不能工喜誦他人之工者今雖老
餘習尚在得所示書反復不知厭所稱道雖不然然觀
其筆勢俯仰亦足以粗得足下為人之一二也幸甚幸
甚比日履茲春和起居何似軾蒙庇粗遣每念處世窮
困所向輒值墻谷無一遂者獨於文人勝士多獲所欲
如黃庭堅魯直晁補之無咎秦觀太虛張來文潛之流
皆世未之知而軾獨先知之今足下又不見鄙欲相從
游豈造物者專欲以此樂見厚也耶然此數子者挾其

有餘之資而驚於無涯之知必極其所如往而後已則亦將安所歸宿哉惟明者念有以反之魯直既喪妻絕嗜好蔬食飲水此最勇決舍弟子由亦云學道三十餘年今始粗聞道考其言行則信與昔者有間矣獨軾偃偃焉未有所得也徐守莘老每有書來亦以此見教想時相從有以發明王子中兄弟得相依甚幸子敏雖失解乃得久處左右想遂磨琢成其妙質也徐州城外有王陵母劉子政二墳向欲為作祠堂竟不暇此為遺恨

近以告莘老不知有意作否若果作當有記文莘老若不自作者足下當為作也無由面言臨書惘惘惟順時自愛謹奉手啟為謝不宣軾再拜

荅李廌書

軾頓首先輩李君足下別後適中得二書皆未果荅專人來又辱長箋且審比日孝履無恙慰慰深矣惠示古賦近詩詞氣卓越意趣不凡甚可喜也但微傷冗後當稍收斂之今未可也足下之文正如川之方增當極其

所至霜降水落自見涯涘然不可不知也錄示孫之翰
唐論僕不識之翰今見此書凜然得其為人至論褚遂
良不譖劉洎太子瑛之廢緣張說張巡之敗緣房琯李
光弼不當圖史思明宣宗有小善而無人君大略皆舊
史所不及議論英發暗與人意合者甚多又讀歐陽文
忠公志文司馬君實跋尾益復慨然然足下欲僕別書
此文入石以為之翰不朽之託何也之翰所立於世者
雖無歐陽公之文可也而况欲託字畫之工以求信於

後世不以陋乎足下相待甚厚而見譽過當非所以為
厚也近日士大夫皆有僭侈無涯之心動輒欲人以周
孔譽已自孟軻以下者皆憮然不滿也此風殆不可長
又僕細思所以得患禍者皆由名過其實造物者所不
能堪與無功而受千鍾者其罪均也深不願人造作言
語務相粉飾以益其疾足下所與游者元聿讀其詩知
其為超然竒逸人也緣足下以得元君為賜大矣唐論
文字不少過煩諸君寫錄又以見足下所與游者皆好

學喜事其善甚善獨所謂未得名世之士為志文則未
葬者恐於禮未安司徒文子問於子思喪服既除然後
葬其服何服子思曰三年之喪未葬服不變除何有焉
昔晉溫嶠以未葬不得調古之君子有故不得已而未
葬則服不變官不調今足下未葬豈有不得已之事乎
他日有名世者既葬而表其墓何患焉辱見厚不敢不
盡冬寒惟節哀自重

答張文潛書

軾頓首文潛縣丞張君足下久別思仰到京公私紛然
未暇奉書忽辱手教且審起居佳勝至慰至慰惠示文
編三復感歎甚矣君之似子由也子由之文實勝僕而
世俗不知乃以為不如其為人深不願人知之其文如
其為人故汪洋澹泊有一唱三歎之聲而其秀傑之氣
終不可沒作黃樓賦乃稍自振厲若欲以警發憤憤者
而或者便謂僕代作此尤可笑是殆見吾善者機也文
字之衰未有如今日者也其源實出於王氏王氏之文

未必不善也而患在於好使人同己自孔子不能使人同顏淵之仁子路之勇不能以相移而王氏欲以其學同天下地之美者同於生物不同於所生惟荒瘠斥鹵之地彌望皆黃茅白葦此則王氏之同也近見章子厚言先帝晚年甚患文字之陋欲稍變取士法特未暇耳議者欲稍復詩賦立春秋學官甚美僕老矣使後生猶得見古人之大全者正賴黃魯直秦少游晁無咎陳履常與君等數人耳如聞君作太學博士願益勉之德輶

如毛民鮮克舉之我儀圖之愛莫助之此外千萬善愛
偶飲卯酒醉來人求書不能覩縷

答毛滂書

軾啟比日酷暑不審起居何如頃承示長牋及詩文一
軸日欲裁謝因循至今悚息今時為文者至多可喜者
亦衆然求如足下閒暇自得清美可口者實少也敬佩
厚賜不敢獨饗當出之知者世間唯名實不可欺文章
如金玉各有定價先後進相汲引因其言以信於世則

有之矣至其品目高下蓋付之衆口決非一夫所能抑
揚軾於黃魯直張文潛輩數子特先識之耳始誦其文
蓋疑信者相半久乃自定翕然稱之軾豈能為之輕重
哉非獨軾如此雖向之前輩亦不過如此也而況外物
之進退此在造物者非軾事辱見貺之重不敢不盡承
不久出都尚得一見否

東坡全集卷七十四